



KEMENTERIAN
WILAYAH
PERSEKUTUAN

PENGUMUMAN HASIL KUNJUNGAN MENGHADAP DYMM SULTAN SELANGOR

1. Pada Khamis, 21 November 2019 yang lalu, Duli Yang Maha Mulia Sultan Selangor Sultan Sharafuddin Idris Shah Alhaj Ibni Almarhum Sultan Salahuddin Abdul Aziz Shah Alhaj telah berkenan untuk menerima menghadap saya selaku Menteri Wilayah Persekutuan bersama-sama pegawai-pegawai kementerian dan agensi di Istana Bukit Kayangan, Shah Alam Selangor.
2. Pertemuan selama hampir dua (2) jam itu telah memberi ruang kepada saya untuk melaporkan kepada DYMM Sultan berhubung beberapa perkara berkaitan cadangan pembangunan semula Kampong Bharu dan isu berkaitan status Malay Agricultural Settlement (MAS).
3. Saya bagi pihak Kementerian Wilayah Persekutuan dan agensi di bawahnya ingin merakamkan setinggi-tinggi penghargaan dan lafaz penghormatan yang tiada terperinya kepada DYMM Sultan yang telah sudi melapangkan masa untuk kami menyampaikan warkah sembah maklum tersebut.
4. Kementerian sememangnya mengambil maklum bahawa wujudnya sejarah yang panjang di antara Kampong Bharu dan Kesultanan Selangor. Dengan keprihatinan dan pandangan jauh Kesultanan Selangor pada 1899 lalu, maka terwujudnya Kampong Bharu sebagai penempatan orang Melayu di tengah ibu kota Kuala Lumpur. Oleh yang demikian, Kementerian semestinya akan memberi perhatian khusus terhadap segala pandangan DYMM Sultan terhadap Kampong Bharu.
5. Hasil pertemuan tersebut, besar harapan Kementerian untuk menyempurnakan titah DYMM Sultan yang mahukan Kampong Bharu dibangunkan dengan sebaiknya di samping mengekalkan elemen dan ciri-ciri kemelayuan di Kampong Bharu. Kementerian turut mengambil

maklum titah DYMM Sultan yang menyatakan keadaan Kampong Bharu ketika ini tidak lagi kondusif untuk kehidupan moden dan selesa sedangkan kawasan sekitarnya telah dibangunkan dengan pesat menjadikan Kampong Bharu kelihatan ketinggalan.

6. Selain itu, Kementerian akan memberi perhatian khusus ke atas titah DYMM Sultan yang mahukan lokasi bersejarah di Kampong Bharu seperti Masjid Jamek Kampong Bharu dan Kelab Sultan Sulaiman dikekalkan dan dipulihara sepenuhnya supaya dapat diwarisi dan diketahui generasi akan datang mengenai sejarah kewujudan Kampong Bharu.

7. Kementerian akan mengambil berat titah DYMM Sultan supaya nama Kampong Bharu itu sendiri dikekalkan termasuklah nama-nama jalan yang telah diletakkan nama-nama salasilah Kesultanan Selangor dan tokoh-tokoh penting yang telah terlibat di peringkat awal kewujudan Kampong Bharu.

Sekian, terima kasih.

KHALID ABD SAMAD
Menteri Wilayah Persekutuan
Pada 25 November 2019